

Festival Himno y Bandera dedica na Sra. Ailene Tromp Croes

Aruba



ORANJESTAD - E di 15 festival “Un Canto Pa Aruba y Su Himno y Bandera” lo tuma lugar diadomingo 7 di maart na Centro di Barrio Tanki Lender y lo ser dedica na un gran dama den nos folklore y cultura Arubano cu ta Sra. Ailene Tromp-Croes.

Sra. Ailene ta sali di un famia musical y na edad di 8 aña el a cuminsa canta cu grupo di Aguinaldo den diferente show tanto den club, Seri Noka y na varios establecimiento renombra y sin kita afo na Hotel.

Durante su infancia el a canta na hopi fiesta di casamento hunto cu su ruman Bertha cu e trio guitarista cu ta consisti di Edwin Kock, Edwin Tromp y Jani Maduro pa diferente bruid na misa.

Ailene mes tabata domina guitarra y cuarta, danki na su ruman Lindo (d.f.m.) y den canto na su rumannan Aida y Lucia como inolvidable Duo. Tambe Ailene den e mesun periodo a canta diferente tipo di musica complaciendo cu otro hobennan.

Su arte a sigui den canto cu Mariachi y a gana Festival di Antiyas y Aruba, y su composicion nan propio a sa di gana diferente Festival Mexicano, y tambe el a graba cu Mariachi Internacional y cu Mariachi Mixto cu musiconan local cu areglo di su ruman Chinto y composicion nan di dje mes y di su ruman Chaly Croes (d.f.m.) den voz duo cu Bertha Wolff, CD titular “Mi Guitar y Serenata”, cual tabata un exito total tanto na aruba, Antiyas y Hulanda y a ser registra na Camara di

Comercio na Mexico.

■ ***Su deseo pa graba mas variacion a sigui cu “Clase Aparte” produci pa Martin Quandus y tabata acompaña pa nos mesun musiconan renombra y tabata un exito grandi y hopi gusta na Aruba. Tambe el a participa den Sabado Sensacional na 1990 y e tema promocional a sa di hit na Colombia, Venezuela, Puerto Rico y Republica Dominicana.***

Ailene tabata forma parti di Latin Four na Manchebo y despues cu Aruban Band, Melomania. Na aña 1990 Ailene a gana e premio di Cantante mas Popular di Aruba.

E cancion “Aruba Noble Patria” ta propio composicion y areglo ta di Chinto Croes y musica di Ola Tropical y a gana

e 3 miho premionan pa e prome festival “Un Canto pa Aruba”, organiza pa Joonchi Bislik (d.f.m.) cual cancion hunto cu tur su produccion nan anterior y pa su esfuerzo y sacrificio a engrandece nos cultura y a gana e Premio Mo Tito.

Desde e tempo ey School Sta. Anna na Noord tur aña dia 18 de maart ta toca e tema Aruba Noble Patria como segundo Himno durante e celebracion na dicho school.

Aruba Noble Patria a gana como e mihor cancion local den Top 100 di Radio Carina.

Tambe Ailene a produci temanan na Papiamento dedica na Mama y Tata cu tabata su propio composicion y tambe di Martin Quandus y Eric Tchong cu a keda graba pa semper ariba produccion di Watapana Recording Studio di Emile Kelkboom. E temanan tabata waltz, danza, tumba, bolero y bachata.

Grandi tabata na aña 1992 cu Ailene mester a representa Aruba na Hulanda den sitionan prestigioso cu Trio Huasteca pa nos Rubianonan disfruta di nos Cultura y tambe otro Cultura internacional.

Den su trayectoria musical Ailene a sigui produci su mesun composicionnan ariba un CD di gaita cu areglo di Dennis Werleman (d.f.m.) y esaki tabata un produccion

pa no lubida.

Mescos cu Tipico, el a produci su cancionnan, wals, tumba y danza dedica na nos dushi ARUBA ariba un CD dunando realse na nos hendenan, nos naturaleza, nos amabilidad y cordialidad y esaki ta tur loke nos arubianonan tin mester pa mantene nos cultura.

Dande ta su preferencia ariba otro cancionnan pa motibo den e canto di Dande ta sali bendicion y e bon deseonan di mas bunita pa paz y bendicion pa Aruba y henter mundo.

Ailene a sigui participa den diferente festival di “Un Canto pa Aruba su Himno y Bandera” di Harry Croes unda el a gana tambe cu cancion di Casin Giel y Martin Quandus. Su propio composicion nan tambe a cay den puesto halto den e festival aki.

Ailene a participa 3 biaha den Festival di Tumba como solista y tambe como corista mescos pa Calypso contest.

Su ruman Bertha Wolff semper a canta mayoria di su tema nobo y Jelitza Croes a gana cu u composicion kedando na di 3 lugar mescos cu den e ultimo festival di Dande y Joanne Werleman tambe a sali di 3 lugar. Actualmente Ailene ta preparando pa su siguiente produccion pa nos fiel

amantenan di nos musica cultural.

Ailene ta felicita sr. Harry Croes hunto cu su comision y tur cu ta traha pa nos cultura y na prensa en general, specialmente na e emisoranan di tradicion, tur musico, tur tipico pa e bendicion aki pa duna compositornan mas oportunidad pa participa hunto pa sigui mantene nos creacion y inspiracion pa nos musica y nos folklore cu ta nos herencia musical y lo keda semper den nos curazon y pa mantene na promer lugar.

Danki Papa Dios pa e regalo di duna nos hendenan e meta fiho pa nos Cultura florece. Ailene su deseo maximo ta pa e maestronan, tur gobierno, musiconan, emisoranan keda duna realse na nos Himno y Bandera y pa hunto nos sostene loke ta di nos y cu nos a lucha p’e.

Nos musica, nos cuminda crioyo, nos custumber, nos nobleza, charisma y respet ta loke nos grandinan a siña nos pa continua y proyecta tur esaki semper bay den nos generacion.

Danki Harry, danki na tur cu awe nochí ta un anochi grandi y cu bendicion pa nos Festival dedica na nos Himno y Bandera 2010 recordando 21 aña pasa e prome cancion ganador di e Festival “Un Canto pa Aruba” – “Aruba Noble Patria”.